

DONOSTIAKO KALEETAN ETXERIK GABE BIZI DIREN PERTSONA **KOPURUAREN IGOERA DELA-ETA KONTROL MOZIOA**

Olaia Duarte Lopezek, EH BILDU udal taldeko zinegotziak, Udaltzaren Organo Araudiaren 98. artikulua oinarri, mozio hau aurkezten du Udaltzaren azter dadin. Mozioa 2022ko azaroaren 14an Pertsonen Zerbitzuen Batzordean aztertutako interpelazioaren ondorioa da.

JUSTIFIKAZIOA

Gure hiriko kaleetan gero eta etxerik gabeko jende gehiago dago, Eusko Jaurlaritzak egindako azterketek, pobrezia-inkestek eta urrian egindako kale kontaketak baieztatzen duten bezala.

Hain zuzen ere, urriaren 26tik 27rako gauean, kale gorrian dauden pertsonen zenbaketaren *Kale Gorrian* izeneko zenbaketa egin zen EAEko 23 udalerritan. Donostian 2011. urteaz geroztik egin da kontaketa hau eta datuek etxerik gabe, hiriko kaleetan, bizi diren pertsona kopuruaren igoera adierazten dute.

Donostian dinamika honetan parte hartu zuten 83 boluntarioei esker, Donostian 220 pertsona zenbatu ziren etxerik gabe: EAEn zenbatutako pertsonen %33,3 eta 2018an egindako kontaketa baino 119 pertsona gehiago. Gauzak horrela, etxerik gabeko pertsonen hazkunde handiena izan duten udalerrien artean dago Donostia. Esan bezala, datuek baieztatu duten errealitate gordin hau behin eta berriro adierazi izan da hirugarren sektoreko eragileen aldetik eta EH Bildu udal taldeak ere, behin eta berriro, egin ditu proposamenak Donostiako Udalean pertsona hauentzako baliabideak hobetu daitezen eta etxebizitza arazoaren aurrean neurriak har daitezen.

Bestalde, zenbaketa honek agerian jarri du azkeneko urtean hamaika aldiz iragarri duguna, nahiz eta Udal Gobernuak etengabe ezeztatu duen: gure hiriburuak ez du inondik inora betetzen 2016an Etxegabeentzako Euskal Estrategian sinatutako neurrietako bat (hau da, gutxienez, % 20 murriztea kalean, EAEko udalerrri nagusietan, lo egiten duten pertsonen kopuruak 2020rako).

EH Bildu talde politikoa **Grupo político EH Bildu**

Ijentea, 1 - Tel. 943481027 - www.donostia.ehbildu.eus -
20003 Donostia

Baina kezkarriena ez da Donostian etxerik gabeko pertsonen kopurua %20 murrizteko erabakia ez bete izana, baizik eta, gainera, zifrak laukoiztu izana 6 urteetan: 2016. urtean 115 boluntariok 48 pertsona kontatu zituzten etxerik gabe hiriko kaleetan eta aurten 83 boluntariok 220 etxegabe kontabilizatu dituzte.

Errealitate horren aurrean, 2022ko otsailean, hiriko eragile sozialetan parte hartzen duten boluntarioek hainbat eskaera aurkeztu zituzten Udalean, idatziz eta telematikoki, Donostiako kaleetan lo egiten duten etxerik gabeko dozenaka pertsonarentzako baliabideak irekitzeko eskatuz, batez ere, negu garaian.

Azaroko batzordeetan delegatua interpelatuta, negu honetan ere iazko baliabideak erabiliko direla aipatu zuen (hau da, Abegi Etxea, Gauekoa, larrialdi pisuak eta La Sirena) eta hotzaren protokoloa bere horretan mantenduko dela. Berrikuntza bezala gehitu zuen hotzaren baliabideak 100 plaza gehiago izango zituela aurten, baina aipatu beharra dago hori dagoeneko egin zela pandemia garaian eta iaz ere La Sirenak plaza kopuru hori zuela. Hortaz, ezer berririk negu honetarako.

Gogoan izan behar dugu, 2021-2022ko neguko tenperatura hotzak zirela-eta, urtarrilaren 14an, herritarren eta eragile sozialen salaketa ugarien ondoren, nahiz eta irekiera-protokoloak eskatzen dituen muturreko hotz-baldintzak betetzen ez ziren, 14, 15, 16 eta 17ko gauetan 57 pertsona joan zirela baliabide horretara. Hilaren 18an, berriz, Udal Gobernuak La Sirena itxi zuen, eta pertsona horiek guztiak berriz ere kalera itzuli ziren. Gero, urtarrilaren 20an ireki zen berriro errekurtsua, eta 23an itxi zen berriro, hotz handia egin arren. Ondoren, irekitzen eta ixten joan zen, egun batetik bestera iragarritz.

Gipuzkoako hainbat udalerritan neguko planak eta baliabideak prestatzen hasi dira dagoeneko. Adibidez, Eibarko Udalaren kasuan, neguko dispositiboa ireki zen urriaren 15ean eta egunero egongo da zabalik 2023ko apirilaren 15era arte. Donostian, ordea, 220 pertsona kale gorrian izanda, protokolo zaharkituak mantentzen ditu Udal Gobernuak.

Era berean, urriaren 28an udal talde honek Abegi Etxera egindako bisitan ikusi genuen bezala, aterpea izatea lortzen duten pertsonen instalazio oso zaharkituetan egoten dira (hezetasuna dago, geletan ez dago altzari nahikorik, erabiltzaile guztientzat bi ordenagailu daude, lanparak

EH Bildu talde politikoa
Grupo político EH Bildu

Ijentea, 1 - Tel. 943481027 - www.donostia.ehbildu.eus -
20003 Donostia

galdatuta daude konpondu gabe, instalazioak oso hotzak dira...), berez oso gordina den errealitate bat zailduz eta arlo honetan lan egiten duten profesionalen lana oztopatuz.

Azaldutako egoera kontuan hartuta, behean sinatzen duen zinegotziak honako MOZIO hau aurkezten du:

KONTROL MOZIOA

1.- Udalbatzak hertsatuki eskatzen dio Udal Gobernuari kale egoeran dauden pertsonentzat Udalak dituen baliabideetan konponketak egin ditzala, etxerik gabeko pertsonak baldintza hobean artatzeko, egonaldiak atseginoak izateko eta profesionalek berme eta erosotasun handiagoz lan egiteko lekuak izan daitezen.

2.- Udalbatzak hertsatuki eskatzen dio Udal Gobernuari hotzari buruzko gaur egungo udal protokoloa malguago batez aldatzea, neguko hotz eta euri baldintza meteorologikoetarako baliabideak irekitzea aurreikusten duena, baliabideak irekitzeko izozte-arriskurik egon arte itxaron gabe.

Donostian, 2022ko abenduaren 15ean

Olaia Duarte López

EH Bildu udal taldeko zinegotzia